



24/12/2024



MES 9 24 0001651546

გადაწყვეტილება

სსიპ - აკაკი წერეთლის სახელმწიფო უნივერსიტეტის „ბიზნესის ადმინისტრირების“
საბაკალავრო საგანმანათლებლო პროგრამის აკრედიტაციის შესახებ

1. გადაწყვეტილების მიღების სამართლებრივი საფუძვლები

1.1. „უმაღლესი განათლების შესახებ“ საქართველოს კანონის 66-ემუხლის პირველი პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტისა და საქართველოს განათლებისა და მეცნიერების მინისტრის 2011 წლის 4 მაისის №65/ნ ბრძანებით დამტკიცებული „უმაღლესი საგანმანათლებლო დაწესებულებების საგანმანათლებლო პროგრამების აკრედიტაციის დებულების“ 27²-ე მუხლის პირველი პუნქტის მიხედვით, საგანმანათლებლო პროგრამების აკრედიტაციის საბჭო (შემდგომში - საბჭო) სააკრედიტაციო დოკუმენტაციის, აკრედიტაციის ექსპერტთა ჯგუფის დასკვნის, დაწესებულების მიერ აკრედიტაციის ექსპერტთა ჯგუფის დასკვნის პროექტზე წარმოდგენილი არგუმენტირებული პოზიციის შესწავლისა და ზეპირი მოსმენის გამართვის საფუძველზე, იღებს გადაწყვეტილებას საგანმანათლებლო დაწესებულების საგანმანათლებლო პროგრამების აკრედიტაციის თაობაზე. აკრედიტაციის დებულების 27⁵-ე მუხლის მე-5 პუნქტის თანახმად, საბჭო ვალდებულია, დაასაბუთოს მის მიერ მიღებული გადაწყვეტილება.

1.2. „განათლების ხარისხის განვითარების შესახებ“ საქართველოს კანონის 22-ემუხლის მე-2 პუნქტის „ა“ ქვეპუნქტისა და აკრედიტაციის დებულების 27⁵ - ე მუხლის პირველი პუნქტის „ა“ ქვეპუნქტის შესაბამისად, საბჭო იღებს გადაწყვეტილებას საგანმანათლებლო პროგრამისთვის აკრედიტაციის მინიჭების შესახებ, თუ „უმაღლესი განათლების შესახებ“ საქართველოს კანონის 66-ე მუხლის მე-4 პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის მე-8 პუნქტისა და აკრედიტაციის დებულების 27⁶ - ე მუხლის პირველი პუნქტის „ა“ ქვეპუნქტის შესაბამისად, საგანმანათლებლო პროგრამის პირველი და ყოველი მომდევნო აკრედიტაციის შემთხვევაში, საგანმანათლებლო პროგრამა აკრედიტაციის სტანდარტებთან შესაბამისობის შეფასებისას, ყველა სტანდარტთან მიმართებით საბჭოს მიერ შეფასდა, როგორც „სრულად ან/და მეტწილად შესაბამისობაშია სტანდარტის მოთხოვნებთან“.

1.3. „აკრედიტაციის დებულების“ 27⁶-ე მუხლის პირველი პუნქტის „ბ“ ქვეპუნქტის თანახმად, ერთ სტანდარტთან მიმართებით მაინც შეფასდა, როგორც „მეტწილად შესაბამისობაშია სტანდარტის მოთხოვნებთან“ და არცერთ სტანდარტთან მიმართებით არ შეფასდება, როგორც „ნაწილობრივ შესაბამისობაშია სტანდარტის მოთხოვნებთან ან „არ არის შესაბამისობაში სტანდარტის მოთხოვნებთან“, საბჭო იღებს გადაწყვეტილებას აკრედიტაციის შესახებ და დაწესებულებას განუსაზღვრავს ვადას მიღებული რეკომენდაციების შესრულების თაობაზე ანგარიშის წარსადგენად, რაც აისახება საბჭოს სხდომის ოქმში.

2. აღწერილობითი ნაწილი და დასაბუთება

2.1. სსიპ - განათლების ხარისხის განვითარების ეროვნულ ცენტრში (შემდგომში - ცენტრი) 2024 წლის 01 მაისს შემოვიდა სსიპ - აკაკი წერეთლის სახელმწიფო უნივერსიტეტის №492314 (ცენტრში რეგისტრაციის - №514299) წერილი, რომლითაც დაწესებულებამ წარმოადგინა სააკრედიტაციო განაცხადი "ბიზნესის ადმინისტრირების" (240 კრედიტიანი) საბაკალავრო, "ბიზნესის ადმინისტრირების" (180 კრედიტიანი) საბაკალავრო, "ბიზნესის ადმინისტრირების" სამაგისტრო, "საჯარო მმართველობის" სამაგისტრო, "სატრანსპორტო ლოგისტიკის" სამაგისტრო, "ლიდერობა და მენეჯმენტი უმაღლეს განათლებაში" ინგლისურენოვანი სამაგისტრო და "ბიზნესის ადმინისტრირების" სადოქტორო საგანმანათლებლო პროგრამების კლასტერის აკრედიტაციის თაობაზე.

2.2. ცენტრის დირექტორის 2024 წლის 21 ივნისის №716263 ბრძანების საფუძველზე, სსიპ - აკაკი წერეთლის სახელმწიფო უნივერსიტეტი ცნობილ იქნა აკრედიტაციის მაძიებლად. ცენტრის 2024 წლის 06 სექტემბრის №1078624 ბრძანებით შეიქმნა აკრედიტაციის ექსპერტთა ჯგუფი, რომელმაც დაწესებულებაში ვიზიტი "ბიზნესის ადმინისტრირების" (240 კრედიტიანი) საბაკალავრო, "ბიზნესის ადმინისტრირების" (180 კრედიტიანი) საბაკალავრო, "ბიზნესის ადმინისტრირების" სამაგისტრო, "საჯარო მმართველობის" სამაგისტრო, "სატრანსპორტო ლოგისტიკის" სამაგისტრო, "ლიდერობა და მენეჯმენტი უმაღლეს განათლებაში" ინგლისურენოვანი სამაგისტრო და "ბიზნესის ადმინისტრირების" სადოქტორო საგანმანათლებლო პროგრამების კლასტერის შეფასების მიზნით განახორციელა 2024 წლის 8, 9 და 10 ოქტომბერს. ექსპერტთა ჯგუფის მიერ წარმოდგენილი დასკვნის შესაბამისად, სააკრედიტაციოდ წარმოდგენილი „ბიზნესის ადმინისტრირების" (180 კრედიტიანი) საბაკალავრო საგანმანათლებლო პროგრამა შეფასდა შემდეგნაირად:

სტანდარტები	შესაბამისობაშია მოთხოვნებთან	მეტწილად შესაბამისობაშია მოთხოვნებთან	ნაწილობრივ შესაბამისობაშია მოთხოვნებთან	არ არის შესაბამისობაში მოთხოვნებთან
1. საგანმანათლებლო პროგრამის მიზანი, სწავლის შედეგები და მათთან პროგრამის შესაბამისობა		x		
2. სწავლების მეთოდოლოგია და ორგანიზება, პროგრამის ათვისების შეფასების ადეკვატურობა	x			
3. სტუდენტთა მიღწევები, მათთან ინდივიდუალური მუშაობა		x		
4. სწავლების რესურსებით უზრუნველყოფა		x		
5. სწავლების ხარისხის განვითარების შესაძლებლობები		x		

2.3. საბჭომ შეისწავლა საგანმანათლებლო პროგრამების აკრედიტაციასთან დაკავშირებული დოკუმენტაცია, კერძოდ, თვითშეფასების ანგარიშსა და მასზე თანდართულ დოკუმენტაციაში

ასახული ინფორმაცია, ექსპერტთა ჯგუფის დასკვნა, ექსპერტთა ჯგუფის დასკვნის პროექტზე აკრედიტაციის მამიებლის მიერ ცენტრისთვის წარმოდგენილი არგუმენტირებული პოზიცია.

2.4 ზეპირი მოსმენა გაიმართა **2024 წლის 10 დეკემბერს**. სააკრედიტაციო განაცხადის, აკრედიტაციის ექსპერტთა ჯგუფის დასკვნისა და ექსპერტთა ჯგუფის დასკვნის პროექტზე აკრედიტაციის მამიებლის მიერ ცენტრისთვის წარმოდგენილი არგუმენტირებული პოზიციის, ასევე, სხდომაზე დაინტერესებული მხარის ზეპირი პოზიციის მოსმენის საფუძველზე, საბჭომ სრულად გაიზიარა ექსპერტთა დასკვნაში ასახული შეფასება.

3. სარეზოლუციო ნაწილი

„უმაღლესი განათლების შესახებ“ საქართველოს კანონის 66-ე მუხლის პირველი პუნქტის, მე-2 პუნქტის „ა“ ქვეპუნქტის, მე-3 და მე-4 პუნქტების, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტის, მე-2 პუნქტის „ა“ ქვეპუნქტის, მე-3 და მე-8 პუნქტების, აკრედიტაციის დებულების 27² -ე მუხლის პირველი პუნქტის, 27⁵ -ე მუხლის პირველი პუნქტის „ა“ ქვეპუნქტისა და მე-5 პუნქტის, 27⁶ - ე მუხლის პირველი პუნქტის „ბ“ ქვეპუნქტის, „საჯარო სამართლის იურიდიული პირის - განათლების ხარისხის განვითარების ეროვნული ცენტრის საქმისწარმოების წესისა და შინაგანაწესის დამტკიცების შესახებ“ სსიპ - განათლების ხარისხის განვითარების ეროვნული ცენტრის დირექტორის 2011 წლის 01 ივნისის №223 ბრძანების მე-8 მუხლისა და საქართველოს ზოგადი ადმინისტრაციული კოდექსის 53-ე მუხლის შესაბამისად, აკრედიტაციის საბჭომ 13 ხმით არცერთის წინააღმდეგ:

გადაწყვეტა:

1. დაკმაყოფილდეს სსიპ - აკაკი წერეთლის სახელმწიფო უნივერსიტეტის მიერ წარმოდგენილი სააკრედიტაციო განაცხადი და დანართი №1-ით გათვალისწინებულ „ბიზნესის ადმინისტრირების" (180 კრედიტიანი) საბაკალავრო საგანმანათლებლო პროგრამას მიენიჭოს აკრედიტაცია 7 წლის ვადით, 2031 წლის 10 დეკემბერამდე, 1 წლის თავზე ანგარიშის წარმოდგენის ვალდებულებით.
2. ცნობილ იქნას აკრედიტაციის ექსპერტთა ჯგუფის დასკვნა „ბიზნესის ადმინისტრირების" (240 კრედიტიანი) საბაკალავრო საგანმანათლებლო პროგრამის შესახებ ამ გადაწყვეტილების განუყოფელ ნაწილად (დანართი №2).
3. ცნობილ იქნას საბჭოს 2024 წლის 24 დეკემბრის №1650712 ოქმის №04 ნაწილი ამ გადაწყვეტილების განუყოფელ ნაწილად (დანართი №3).

4. დაწესებულებას საბჭომ შესასრულებლად განუსაზღვრა შემდეგი რეკომენდაციები და რჩევები:

კლასტერის რეკომენდაციები:

კომპონენტი 1.3

რეკომენდებულია, გაუმჯობესდეს სწავლის შედეგების შეფასების მექანიზმები.

კომპონენტი 1.4

რეკომენდებულია, საბაკალავრო პროგრამების სტრუქტურა (თავისუფალ კომპონენტებთან მიმართებაში) შესაბამისობაში მოვიდეს სწავლის სფეროების კლასიფიკატორთან.

კომპონენტი 1.5

რეკომენდებულია, გადაიხედოს შეფასებული საგანმანათლებლო პროგრამების ყველა სასწავლო კურსის სავალდებულო და დამატებითი ლიტერატურის სია, იმისათვის, რომ

უზრუნველყოფილი იყოს რესურსების რელევანტურობა, თანამედროვეობა და აკადემიურ სტანდარტებთან შესაბამისობა.

რეკომენდებულია, გადამოწმდეს სილაბუსების ლიტერატურის ნაწილში მითითებული ბმულები იმისათვის, რომ მითითებული იყოს არსებული რესურსები.

კომპონენტი 2.1

რეკომენდებულია, პროგრამის მიმდინარე შედეგებთან შესაბამისობის გაძლიერების მიზნით განახლდეს არსებული მემორანდუმები.

კომპონენტი 4.3

რეკომენდებულია პერსონალის CV-ების გაუმჯობესება, რომ მოიცვას სრული ინფორმაცია გამოცემლებისა და პუბლიკაციების ბმულების შესახებ.

კომპონენტი 5.1

რეკომენდებულია, რომ ხარისხის უზრუნველყოფის სამსახურმა ჩაატაროს სწავლება/სამუშაო შეხვედრები აკადემიური პროგრამების გუნდთან, რათა უზრუნველყოს მათი ეფექტიანი ჩართულობა პროგრამების შეფასებისა და ხარისხის უზრუნველყოფის მექანიზმების შემუშავების პროცესში, რაც ხელს შეუწყობს უფლებების, პასუხისმგებლობებისა და დავალებების დელეგირებას პროგრამების შეფასებისა და გაუმჯობესების დროს.

რეკომენდებულია, რომ ხარისხის უზრუნველყოფის სამსახურის მონაწილეობით, საფუძვლიანად იქნეს შესწავლილი პროგრამების რუქები და სწავლის შედეგების შეფასების გეგმები. გარდა ამისა, პროგრამებისათვის უნდა დადგინდეს ინდივიდუალური სამიზნე ნიშნულები, და უნდა ჩატარდეს სასწავლო სესიები ან სამუშაო შეხვედრები პროგრამების განმახორციელებელ გუნდთან.

კომპონენტი 5.2

რეკომენდებულია, რომ გარე ექსპერტიზის მეშვეობით მიღებული რეკომენდაციები სრულად იქნეს შესწავლილი და გაანალიზებული იმის უზრუნველსაყოფად, რომ საგანმანათლებლო პროგრამებში განხორციელდეს მნიშვნელოვანი და განვითარებაზე მიმართული რეკომენდაციები.

პროგრამის რეკომენდაციები:

კომპონენტი 1.1

რეკომენდებულია, ხელახლა განისაზღვროს სასწავლო პროგრამის მიზანი იმისათვის, რომ აისახოს ბიზნესის ადმინისტრირების სფეროს უნიკალური ორიენტაცია.

კომპონენტი 1.2

რეკომენდებულია, სწავლის შედეგები არ იყოს ჩამოყალიბებული მხოლოდ საგანმანათლებლო პროგრამის ერთი სასწავლო კურსის საფუძველზე.

რეკომენდებულია, სწავლის შედეგების გადახედვა იმისათვის, რომ უკეთ შეესაბამებოდეს პროგრამის აკადემიურ მიზნებს.

კლასტერის რჩევები:

კომპონენტი 1.5

სასურველია, გადაიხედოს სავალდებულო ლიტერატურის მოცულობა, რომელიც უნდა მოიცავდეს არა მხოლოდ კანონებს და კანონმდებლობას, არამედ შესაბამის სამეცნიერო სტატიებს.

კომპონენტი 3.1

სასურველია, გაძლიერდეს სტუდენტების საერთაშორისო მობილობა სემესტრულ გაცვლით პროგრამებში და მოკლევადიან საერთაშორისო პროექტებში ჩართულობის გაზრდის გზით.

სასურველია, გაიზარდოს სამეცნიერო - კვლევით პროექტებში სტუდენტების ჩართულობა საბაკალავრო პროგრამებში.

კომპონენტი 4.1

გადაიხედოს პერსონალის ფაქტობრივი დატვირთვა და მოყვანილი იქნეს შინაგანაწესთან შესაბამისობაში.

კომპონენტი 4.3

მიზანშეწონილია გაიზარდოს პერსონალის ჩართულობა სამეცნიერო კვლევით საქმიანობაში საერთაშორისო დონეზე მაღალრეიტინგულ, "გლობალურ სამეცნიერო საძიებო სისტემებში ინდექსირებულ ჟურნალებში.

5. საბჭოს აღნიშნული გადაწყვეტილება ძალაში შევიდეს 2024 წლის 10 დეკემბერს.

6. საბჭოს მიერ გაცემული რეკომენდაციების შესრულების შესახებ ანგარიშის წარმოდგენის ვადად განისაზღვროს ერთი წელი - 2025 წლის 10 დეკემბრამდე.

7. საბჭოს მიერ მიღებული გადაწყვეტილება, საქართველოს ზოგადი ადმინისტრაციული კოდექსის 180-ე მუხლის პირველი ნაწილისა და „განათლების ხარისხის განვითარების შესახებ“ საქართველოს კანონის 24¹ მუხლის პირველი პუნქტის შესაბამისად, საგანმანათლებლო დაწესებულების მიერ შეიძლება გასაჩივრდეს სააპელაციო საჩივრის სააპელაციო საბჭოში წარდგენის გზით შემდეგ მისამართზე: ქ. თბილისი, მ. ალექსიძის მე-2 შესახვევი №2, ან თბილისის საქალაქო სასამართლოს ადმინისტრაციულ საქმეთა კოლეგიაში სარჩელის შეტანის გზით შემდეგ მისამართზე: ქ. თბილისი, დავით აღმაშენებლის ხეივანი N64, აღნიშნული გადაწყვეტილებისა და მისი დასაბუთებითი ნაწილების (დანართი №1, დანართი №2, დანართი №3) დაწესებულების ინფორმირების დღიდან, ერთი თვის ვადაში.

საგანმანათლებლო პროგრამების აკრედიტაციის საბჭო

მდივანი

ტეფნაძე დავით

დ. ციციშვილი

სსიპ-განათლების ხარისხის განვითარების ეროვნული

ცენტრი

უმაღლესი საგანმანათლებლო პროგრამების

აკრედიტაციის საბჭო

სხდომის თავმჯდომარე

თუთბერიძე გოჩა

გ. ალექსიძე

